

Ingoa: _____**Rangi:** ____/____/____**Rere Waka**

nā Roimata Paewai Mitchell rāua ko Ben Ngaia

Kahukura

Kei te hoe māua i ō māua waka. Kei te whai au i ngā tohutohu a tōku pouako. Engari, ka āhua matakū ahau. Kāhore au i te pīrangi ki te takahuri. Ka kī mai ia, “Kei te pai, e tama? Tēnā, hoea te waka pēnei i ahau.” Ka pōturi te haere o tāku hoe i roto i te wai. Engari, ka āhua matakū tonu ahau. Ka haere te waka pēnei i te ngata, ā, kāhore au i te pīrangi ki te takahuri.

Ka kī mai ia, “Kei te pai e tama? Tēnā, whakamahia.” Ka tere haere te hoe a tōku pouako i roto i te wai. Ka āta haere tāku hoe i roto i te wai. Engari, ka matakū ahau. Ka haere te waka pēnei i te hōiho, ā, kāhore au i te pīrangi ki te takahuri.

Ka kī mai ia, “Kei te pai, e tama? Tēnā, whakamahia hoki e koe.” Ka whakawhiti tōku pouako i tāna hoe, mai i te taha mauī ki te taha matau. Ka āta whakawhiti au i tāku hoe. Engari, ka matakū ake ahau. Ka tītaha te waka pēnei i te nēke, ā, kāhore au i te pīrangi ki te takahuri.

Ka kī mai ia, “Kei te pai, e tama? Tēnā, me haere tonu.” Ka pai haere te hoe a tōku pouako i roto i ngā ngaru iti. Ka āta piki, ka āta heke tāku hoe i roto i te wai. Engari, kua ngaro taku matakū. Ka tere ake te waka pēnei i te manu. Kua hiamō kē au!

Tēnā, ka maranga ake te ama o tōku waka. Ka tere haere tōku waka pēnei i te pouākai. Kātahi ka maranga ake te ama, ā, ka pōrutu! Kua takahuri. “Aiii auē!” tāku karanga atu. Ka kī tōku pouako, “Kei te pai, e tama? Ā tōna wā, ka tohutohu au i a koe ki te haere pēnā i te kiwi.” “Āe rā, e Pā,” tāku whakautu, ahakoa tōku whakamā.